

CONVENIO DE COLABORACIÓN ENTRE A AXENCIA GALEGA DAS INDUSTRIAS CULTURAIS E CAMIÑO ESCENA NORTE AIE PARA O DESENVOLVEMENTO EN GALICIA DO PROGRAMA DE INTERCAMBIO CULTURAL "CAMIÑO ESCENA NORTE 2021"

Santiago de Compostela

COMPARECEN

Por unha banda, Jacobo Sutil Nesta, director da Axencia Galega das Industrias Culturais (Agadic), actuando por delegación do Consello Reitor da Axencia, en virtude do disposto no Decreto 150/2021, do 12 de xullo, polo que se aproba o Estatuto da Axencia Galega das Industrias Culturais e na resolución do 24 de xullo de 2012 (Diario Oficial de Galicia do 29 de agosto de 2012).

Por outra banda, José Antonio Vitoria Armendáriz, administrador de Camiño Escena Norte AIE (en diante a entidade), con NIF V95958914, con poderes suficientes para a celebración deste acto en virtude do establecido nos seus estatutos e na escritura de constitución da Agrupación de Interés Económico "Camino Escena Norte, AIE" (Prot. 2019/518/N/10/04/2019, de data 16/05/2019).

As partes interveñen en función dos seus respectivos cargos e no exercicio das súas facultades que para convir no nome das entidades que representan teñen conferidas e,

EXPOÑEN

PRIMEIRO. A Axencia Galega das Industrias Culturais, creada pola Lei 4/2008, do 23 de maio, de creación da Axencia Galega das Industrias Culturais, é unha axencia pública con personalidade xurídica propia, patrimonio propio e autonomía na súa xestión, segundo establece o artigo 1.2 da citada Lei.

O obxecto da axencia é, entre outros, o fomento da oferta de bens e servizos culturais, fixado polo artigo 3.1 da Lei, e entre as súas funcións atribúense a de favorecer os produtos que difundan a lingua, a cultura e as tradicións propias de Galicia (artigo 5.b) da Lei 4/2008). Para o logro dos seus obxectivos, a Agadic poderá subscribir convenios, realizar actividades comerciais e industriais, conceder subvencións e establecer calquera outra iniciativa de acción tendente á consecución dos obxectivos que se lle atribúen (artigo 5.2 da Lei 4/2008).

SEGUNDO. Camiño Escena Norte é unha agrupación de interese económico con personalidade xurídica e carácter mercantil constituída, segundo os seus estatutos, para organizar, xestionar e producir o proxecto "Camiño Escena Norte", xa sexa de maneira unipersoal ou en colaboración con outras entidades, así como a xestión dos dereitos de propiedade intelectual e industrial que se deriven, e que engloba as entidades Asociación Galega de Empresas de Artes Escénicas (Escena Galega), Asociación de Empresas de Teatro y Danza de Asturias (Escena Asturias), Asociación Cántabra de Empresas Productoras de Artes Escénicas (ACEPAE) e Empresas de Producción Escénica Asociadas de Euskadi (ESKENA).



TERCEIRO. Este convenio de colaboración enmárcase na liña 3 –*Dinamización de asociacións, federacións e colectivos do sector escénico, musical e audiovisual*– da planificación estratéxica da Agadic de actuacións de fomento de actividades mediante convenios de colaboración con fins culturais con entidades de carácter cultural e corporacións locais no ano 2021, aprobada o 25.01.2021 e modificada o 25.05.2021 para dar cabida, entre outras modificacións, ao axuste orzamentario desta actividade de colaboración con Camiño Escena Norte AIE.

Este instrumento de colaboración enmárcase dentro programa de gasto da Agadic 432B–*Fomento das actividades culturais*–, cuxo obxectivo principal se centra en desenvolver as grandes liñas de actuación para o apoio á cultura galega, de xeito que se propicie un compromiso da sociedade galega e das institucións para facer da cultura un dos elementos centrais da vida da nosa sociedade e da súa imaxe no mundo. Este programa de gasto está aliñado coas liñas e obxectivos estratéxicos delimitados na Estratexia da Cultura Galega 21, para garantir a máxima difusión da actividade cultural en todo o territorio de Galicia e entre toda a cidadanía, ademais de asentarmos un tecido social e empresarial significativo e produtivo nos sectores da cultura galega.

Camiño Escena Norte é un proxecto froito da unión estratéxica das asociacións profesionais de produción escénica das comunidades do norte polas que transcorre o Camiño do Norte: Galicia, Asturias, Cantabria e País Vasco, que aglutinan a un centenar de compañías produtoras de teatro, monicreques, danza e novo circo reflexo da enorme calidade, variedade e diversidade das artes escénicas galegas, asturianas, cántabras e vascas.

Camiño Escena Norte artículase ao redor dun itinerario de intercambio cultural entre estas comunidades ofrecendo un "camiño escénico" dende o que amosar a diversidade cultural, lingüística e de formatos e linguaxes escénicas da produción escénica galega, asturiana, cántabra e vasca. Un proxecto que suma á súa vertente cultural a dinamización social e turística e de intercambio entre as catro comunidades autónomas participantes, cunha intensa programación escénica desenvolvida baixo a denominación "Itinerario Constelacións 2021", eixe vertebrador do programa, que pretende ademais multiplicar as posibilidades de relación co público con actividades de encontro e reflexión, de creación ou de participación. Entre setembro e outubro, un itinerario de funcións de teatro, danza, monicreques e novo circo percorrerán os catro territorios, complementada cunha extensa programación expandida coa intención de mostrar o mellor das artes escénicas de cada un dos territorios participantes.

Galicia súmase a este programa de intercambio cultural acoollendo un itinerario de funcións do mellor das artes escénicas asturianas, cántabras e vascas dende as que amosar a calidade, diversidade de linguaxes a estéticas e valor cultural das artes escénicas das comunidades do norte.

CUARTO. Que a Agadic e a entidade consideran esencial o establecemento de accións conxuntas durante 2021 que afonden na promoción e potenciación do sector teatral a través da colaboración neste evento, que destaca pola súa aposta por acadar unha maior interacción entre profesionais e público dos distintos territorios que atravesamos a ruta histórica do Camiño do Norte, que debe derivar, de certo, nunha maior riqueza na oferta cultural para os espectadores, que poden ter acceso, así, a producións escénicas doutros territorios, e enriquecendo deste xeito a proposta cultural do Camiño á vez que o potencia como destino turístico-cultural.

Coa participación neste proxecto, a Agadic cumpre tamén os seus obxectivos de garantir o progreso da cultura galega, e nomeadamente a normalización e o impulso do idioma galego como medio para



protexer e fomentar a identidade cultural de Galicia, o desenvolvemento social, o crecemento económico e o diálogo intercultural en condicións de igualdade e respecto con identidades diferentes nun contexto globalizado. Impulsa a participación, consolidación e cooperación das empresas e profesionais na produción, creación, conservación, difusión e comercialización do patrimonio cultural galego, nun mercado dinámico, sustentable e plural que fomenta a participación cidadá e remova os obstáculos xeográficos, físicos, educativos, sociais ou económicos que poden dificultar o acceso á cultura, a vez que fomenta a demanda de produtos culturais na sociedade galega.

E todo este esforzo no fomento dun ámbito como o escénico realizado por Camiño Escena Norte, AIE, coa organización deste programa coincide coa liña de difusión e promoción da cultura galega que a Agadic está a levar a cabo, de aí que considere fundamental a colaboración mutua nestas iniciativas, que garanten a calidade, profesionalidade e o éxito, sen dúbida, do programa.

Unha maior eficacia dos recursos dispoñibles fai necesaria a estreita colaboración coas asociacións, fundacións e institucións para que, en cada ámbito respectivo de actuación, se poidan realizar, sumando e compartindo esforzos, as actividades culturais que se estimen de interese e utilidade social e cultural. Doutro xeito non sería posible para a Agadic asumir en solitario os custos de todas as actividades culturais que se consideran esenciais para o desenvolvemento cultural en Galicia. E son estes convenios ferramentas imprescindibles de colaboración que axudan a equilibrar os custos e as necesidades ademais de garantir a calidade dos eventos e das súas programacións.

Polo anteriormente exposto, as partes, no nome e representación en que concorren e con capacidade legal para este acto, acordan as seguintes

CLÁUSULAS

PRIMEIRA. OBXECTO

O obxecto deste convenio é establecer o marco de colaboración entre a Agadic e Camiño Escena Norte, AIE para o desenvolvemento en Galicia do programa de intercambio cultural "Camiño Escena Norte 2021".

SEGUNDA. ACTUACIÓNS DO PROGRAMA

O programa Camiño Escena Norte concrétese en Galicia coa programación de nove funcións de compañías de artes escénicas procedentes de Asturias (A66 Producciones e Meraki Cía), Cantabria (Anabel Díez Producciones, Babirusa Danza e La Machina Teatro) e País Vasco (Marie de Jongh e Ados Teatro), baixo a denominación "Itinerario Constelacións", que se poderán ver en diferentes espazos escénicos ou ben en espazos de alto interese patrimonial e histórico e espazos ao aire libre entre o 12 de setembro e o 10 de outubro de 2021:

12 de setembro

La naturaleza del silencio. BABIRUSA DANZA (CANT) / Praza da Quintana, Santiago de Compostela

18 de setembro

Abre el ojo. A66 PRODUCCIONES (AST) / Praza da Catedral, Mondoñedo



19 de setembro

Abre el ojo. A66 PRODUCCIONES (AST) / Auditorio Municipal Gustavo Freire, Lugo

25 de setembro

La casa de Bernarda Alba. ANABEL DÍEZ PRODUCCIONES (CANT) / Auditorio Municipal Hernán Naval, Ribadeo

5 de setembro

Olivia y las plumas. LA MACHINA TEATRO (CANT) / Capela da Madalena, Arzúa

26 de setembro

La casa de Bernarda Alba. ANABEL DÍEZ PRODUCCIONES (CANT) / Auditorio Municipal, Melide

1 de outubro

IKIMILIKILIKLIK. Mi pequena. MARIE DE JONGH (EUS) / Auditorio Municipal Carmen Estévez, Vilalba

2 de outubro

Amalgama. MERAKE CÍA (AST) / Mosteiro de Sobrado dos Monxes

10 de outubro

Lloviendo ranas. ADOS TEATROA (EUS) / Salón Teatro, Santiago de Compostela

TERCEIRA. OBRIGA DAS PARTES

A organización e desenvolvemento das actividades obxecto do convenio serán realizadas pola entidade nun proceso de colaboración continua coa Agadic.

Serán obrigas da entidade:

1. A dirección artística do proxecto e a selección dos espectáculos programados baixo criterios de calidade, diversidade de linguaxes e estéticas e valor cultural.
2. A selección dos distintos espazos onde se desenvolven as actuacións.
3. A coordinación e desenvolvemento dos diferentes espectáculos e apoio técnico na posta en escena dos espectáculos nos distintos espazos de exhibición.
4. A difusión axeitada do programa, coa elaboración de materiais de difusión específicos.
5. O cumprimento da lexislación vixente en materia de riscos laborais e seguridade nas actividades desenvolvidas.
6. A implementación de todos os protocolos e medidas hixiénico-sanitarias establecidas legalmente.
7. A correspondente xestión e autorización dos dereitos de autor, ou de calquera outra obriga derivada do Real Decreto legislativo 1/1996 do 12 de abril, polo que se aproba o Texto Refundido da Lei de Propiedade Intelectual.
8. Someterse ás accións de comprobación que realice a Xunta de Galicia, así como prestar colaboración e facilitar canta documentación lle sexa requirida no exercicio das funcións de control que lle corresponden á Intervención Xeral da Comunidade Autónoma de Galicia e ao Consello de Contas de Galicia.

Serán obrigas da Agadic:

1. Aboar a achega económica comprometida para o desenvolvemento de actuacións previstas no convenio de colaboración.



2. Apoio nos procesos de comunicación do programa.
3. Facilitar a dispoñibilidade do Salón Teatro para as representacións.
4. Apoio técnico na posta en escena dos espectáculos desenvolvidos no Salón Teatro.

Nas actividades derivadas do obxecto do convenio, tanto nos actos públicos coma no material de difusión que se elabore, as partes comprométese a facer mención expresa da colaboración da Xunta de Galicia no desenvolvemento das actividades conveniadas. As entidades comprométese a utilizar en todo o material de difusión que realice ao abeiro deste convenio a imaxe corporativa do Xacobeo 21.22 e a da Xunta de Galicia, seguindo as normas respectivas en materia de identidade corporativa.

Para as actuacións levadas a cabo no Salón Teatro:

- As persoas participantes non terán ningunha relación laboral nin de servizos coa Agadic. A Agadic é allea a calquera tipo de relación entre Camiño Escena Norte e terceiros (artistas, organizadores, intermediarios, medios de comunicación, persoal auxiliar...), recoñecendo aquela a falta de responsabilidade da Agadic por calquera feito, contrato, acto, suceso, acontecemento ou reclamación que se puidese derivar por motivo directo ou indirecto respecto ás actividades programadas, as súas celebracións e as súas consecuencias.
- Todas as persoas participantes terán contrato laboral ou artístico cos promotores do evento. Estarán dadas de alta na Seguridade Social e contarán coa cobertura que cubra as posibles contingencias relativas a accidentes laborais, cumprindo, así mesmo, en todo momento a lexislación laboral vixente, de seguridade social e prevención de riscos aplicable.
- Deberán contar cunha póliza de responsabilidade civil sobre as actividades que se vaian desenvolver e que responderá de danos a terceiros, ao persoal ou inmobles e equipamento propiedade da Agadic. A entidade comprométese a manter as dependencias no mesmo estado no que se lles entregue; noutro caso estarán obrigadas a satisfacer o importe de todos os danos ocasionados con motivo da súa utilización indebida ou non imputable ao uso normal do teatro.
- A manipulación do equipamento do Salón Teatro deberá levarse a cabo sempre baixo a supervisión do persoal propio do recinto. Adaptaranse os horarios do persoal do Salón Teatro ás necesidades das actividades sempre e cando as compañías contén co seu propio responsable técnico, e será o persoal do Salón Teatro quen estableza os tempos de montaxe, prestando apoio especializado na mesma, e os tempos de traballo/ensaio, durante os que as compañías disporán dunha persoa de garda para a apertura de portas, encendido de luces e equipos.
- Deben estar en posesión das correspondentes autorizacións e será responsabilidade da entidade a xestión a autorización de todos os dereitos de autor, royalties ou calquera outro concepto derivado dos dereitos de propiedade intelectual dos espectáculos e así como calquera outra obriga derivada da Lei de Propiedade Intelectual, sendo responsable de calquera sanción que se lle puidese impoñer por tales conceptos. A Agadic queda eximida de calquera pagamento por estes conceptos.
- O acordo para a realización das actividades no Salón Teatro quedará sen efecto e anulado, e non dará dereito a reclamación de ningún tipo, no caso de incumprimento por causas de forza maior establecidas legalmente. Para estes efectos, considéranse casos de forza maior as catástrofes naturais, actos de terrorismo que afecten ao normal desenvolvemento das actividades, orde da autoridade competente



que non permita o uso do local onde deban celebrarse as actuacións, folgas, loito nacional e avarías que afecten ao servizo ou subministración eléctrica.

CUARTA. RÉXIME ECONÓMICO

1. Para a realización conxunta do programa de actividades conveniadas, a Agadic realizará unha achega de **40.000 euros**, impostos incluídos, con cargo á aplicación orzamentaria 10.A1.432B.640.1, código de proxecto 2020 00001, dos orzamentos xerais da Comunidade Autónoma de Galicia para o ano 2021, nas que existe crédito axeitado e abondo.

2. O orzamento total das actividades do proxecto é de 46.958,46 euros (impostos incluídos) consonte a seguinte desagregación:

GASTOS	IMPORTE TOTAL DO PROXECTO
Cachés espectáculos	36.039,77 euros
Gastos derivados da xestión de dereitos de propiedade intelectual	426,25 euros
Produción e asistencia técnica	4.458,72 euros
Administración e xestión	2.712,42 euros
Coordinación do programa	3.321,30 euros
TOTAL	46.958,46 euros

3. Considerarase gasto realizado o que foi efectivamente pagado con anterioridade á finalización do período de xustificación establecido neste convenio.

4. No caso de que o importe de xustificación dos gastos sexa inferior ao importe do orzamento presentado (**46.958,46 euros**), a achega da Agadic diminuírase proporcionalmente.

5. O prazo de xustificación das actuacións deste convenio remata o **10 de decembro de 2021**. Non obstante, se existen cotas de seguros sociais liquidables e obrigas análogas con posterioridade á data de xustificación, estas poderanse presentar como data límite o 15 de febreiro do ano 2022.

QUINTA. CONDICIÓNS DE PAGAMENTO E XUSTIFICACIÓN

1. A entidade deberá xustificar o importe total da actividade (**46.958,46 euros**, IVE incluído)

2. Da achega comprometida pola Agadic (40.000 euros) poderanse facer pagamentos parciais que respondan ao ritmo de execución da actividade como financiamento necesario para levar a cabo as actuacións inherentes á colaboración.

A este respecto, admitirase a realización dun pagamento parcial, previa petición da entidade, por importe de ata 20.000 euros, logo de realizarse as primeiras catro funcións, para afrontar os pagamentos correspondentes ás funcións desenvolvidas e gastos de coordinación do programa. A



entidade deberá presentar unha memoria xustificativa e económica na que se recollan as actuacións realizadas co custo das actividades.

3. A cantidade restante aboarase logo da presentación da seguinte documentación xustificativa:

a. Memoria de actuación xustificativa do cumprimento das condicións obxecto deste convenio, con indicación das actividades realizadas. Deberá incluír documentación gráfica das actuacións efectuadas coa inclusión dos logotipos da Xunta de Galicia e do Xacobeo 21.22.

b. Memoria económica xustificativa do custo das actividades realizadas, que conterá:

b.1. Relación clasificada de gastos da actividade, con identificación do acredor (denominación e NIF), nº de factura ou documento de valor probatorio, concepto do gasto claramente expresado, importe, data de emisión, forma de pagamento (transferencia, etc.), data de pagamento e importe.

b.2. Facturas ou documentos de valor probatorio equivalente incorporados na relación a que se fai referencia no parágrafo anterior e a documentación acreditativa do pagamento.

b.3. En relación aos documentos que acrediten os custos de persoal: a copia das nóminas e relación nominal de traballadores (RNT, TC2) e o seu pagamento (xustificantes bancarios das nóminas e recibos de liquidación á Seguridade Social [RLC, TC1]).

b.4. Memoria económica explicativa e aclaratoria dos gastos realizados para a realización das actividades: desviacións ou variacións económica efectuadas con respecto ás partidas inicialmente presupostadas no proxecto económico presentado para a firma do convenio, que deben ser explicadas e motivadas convenientemente na memoria; en caso de gastos relativos a aloxamento, mantenza, viaxes, traslados..., de ser o caso, débese especificar nesta memoria a relación de persoas ás que se refiren os gastos e da súa relación coa actividade conveniada; e todas aquelas cuestións que se considere precisen explicación.

c. Declaración responsable de exención ou suxeición á obriga de declarar o IVE.

d. Unha declaración responsable que conteña unha relación detallada, se é o caso, doutros ingresos ou subvencións que financiasen a actividade subvencionada con indicación do importe e a súa procedencia. No caso contrario, presentarán declaración de non ter solicitado nin concedido ningunha outra axuda para a actividade subvencionada.

4. A documentación correspondente á xustificación presentarase de forma electrónica a través do Rexistro electrónico da Xunta de Galicia (<http://sede.xunta.gal>). En canto á forma de presentación, os xustificantes de gasto así como os seus xustificantes de pagamento deberán entregarse clasificados segundo os apartados da relación clasificada de gastos presentada.

5. A Agadic poderá consultar a través de medios de interoperabilidade se a entidade se atopa ao corrente das súas obrigas tributarias e fronte á Seguridade Social e que non ten pendente de pagamento ningunha outra débeda coa Administración Pública da Comunidade Autónoma, agás que medie oposición expresa da entidade, en cuxo caso a entidade deberá achegar a documentación que a continuación se relaciona:

- Certificación positiva de atoparse ao corrente no cumprimento das súas obrigas tributarias, expedida pola Axencia Estatal de Administración Tributaria (AEAT).
- Certificación positiva de non ter contraída ningunha débeda de natureza tributaria coa Facenda Pública da Comunidade Autónoma, expedida pola Axencia Tributaria de Galicia (ATRIGA).



- Certificación positiva de atoparse ao corrente no cumprimento das súas obrigas coa Seguridade Social, expedida pola Tesourería da Seguridade Social.

Antes da realización de calquera pagamento por parte da Agadic, a entidade deberá estar ao corrente das obrigas tributarias e coa Seguridade Social.

A totalidade do importe achegado pola Agadic está destinado a cubrir os custos das actividades conveniadas, segundo a memoria presentada, sen que haxa beneficio económico de ningún tipo por parte da entidade, e en ningún caso existirá ánimo de lucro xerado polas actividades desenvolvidas nin beneficio industrial ningún.

SEXTA. DEREITOS SOBRE A INFORMACIÓN E OS RESULTADOS

Os resultados froito deste convenio serán de titularidade e uso común da Agadic e das entidades. A Agadic resérvase o dereito de publicar os resultados, parciais ou finais, obtidos durante a execución do convenio que, en todo caso, terán carácter público. Os resultados deste programa de actividades quedarán para futuras edicións e as partes poderán utilizalos nun futuro indistintamente.

Calquera que sexa o medio de difusión, as partes comprométense a facer mención expresa deste convenio. En calquera caso as entidades poderán facer uso dos coñecementos adquiridos durante a realización do programa en actividades propias da súa función.

Calquera transformación dos resultados do programa de colaboración conxunta requirirá o consentimento expreso das partes asinantes do convenio.

SÉTIMA. PERSOAL E RELACIÓNS LABORAIS

A sinatura deste convenio non comporta relación laboral, contractual ou de calquera outro tipo entre os profesionais que van desenvolver as actividades e a Agadic, de xeito que non se lle poderá esixir a esta ningunha responsabilidade, nin directa, nin indirecta, nin subsidiaria, polos actos ou feitos ocorridos durante a execución das actuacións e/ou a vixencia deste convenio.

OITAVA. PUBLICIDADE DO CONVENIO

1. Este convenio será obxecto de publicidade e inscrición de conformidade co disposto no artigo 15 da Lei 1/2016, do 18 de xaneiro, e no Decreto 126/2006, do 20 de xullo, polo que se regula o rexistro de convenios da Xunta de Galicia. Así mesmo, será obxecto de publicación e inscrición en cumprimento do disposto no artigo 17 da Lei 1/2016, do 18 de xaneiro, o artigo 15 da Lei 9/2017, do 13 de xuño, e no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei de orzamentos xerais da Comunidade Autónoma de Galicia para o ano 2006.

2. As partes asinantes do convenio manifestan o seu consentimento para que os datos persoais que constan neste convenio, así como o resto das especificacións contidas nel, poidan ser publicados no Portal de transparencia e Goberno Aberto.



NOVENA. INFORMACIÓN BÁSICA SOBRE PROTECCIÓN DE DATOS DE CARÁCTER PERSOAL

1. Os datos persoais recadados neste convenio serán tratados na súa condición de responsable pola Xunta de Galicia –Agadic– coa finalidade de levar a cabo a tramitación administrativa que se derive deste convenio.

Os datos de carácter persoal que deriven das actuacións desenvolvidas directamente polas entidades, serán tratados por esta na súa condición de responsable do tratamento.

2. O tratamento dos datos baséase no cumprimento dunha misión de interese público ou no exercicio de poderes públicos, conforme as referencias recollidas en <https://www.xunta.gal/informacion-xeral-proteccion-datos>.

3. Os datos recadados pola Agadic serán comunicados ás Administracións públicas no exercicio das súas competencias, cando sexa necesario para a tramitación e resolución dos seus procedementos ou para que os cidadáns poidan acceder de forma integral á información relativa a unha materia coa finalidade de cumprir co obxecto deste convenio.

4. A referencia á publicidade, en cumprimento da normativa de transparencia, axustarase á dita normativa e coas limitacións que esta establece.

5. As persoas interesadas poderán acceder, rectificar e suprimir os seus datos, así como exercitar outros dereitos ou retirar o seu consentimento, a través da sede electrónica da Xunta de Galicia ou presencialmente nos lugares e rexistros establecidos na normativa reguladora no procedemento administrativo común, segundo se explicita na información adicional recollida en <https://www.xunta.gal/informacion-xeral-proteccion-datos>.

6. Así mesmo, as entidades convenientes someteranse ao disposto no Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento dos datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos) e a Lei Orgánica 3/2018, do 5 de decembro, de Protección de Datos Persoais e garantía dos dereitos dixitais.

DÉCIMA. MODIFICACIÓN E RESOLUCIÓN DO CONVENIO DE COLABORACIÓN

1. As modificacións do convenio adoptaranse por acordo expreso e escrito das partes asinantes e de acordo cos trámites que esixa a normativa vixente.

2. Serán causas de resolución deste convenio as seguintes:

- a) O incumprimento de calquera das cláusulas establecidas neste.
- b) O acordo mutuo.

En caso de resolución, o convenio terá os efectos establecidos no artigo 52 da Lei 40/2015, do 1 de outubro.

3. O incumprimento de calquera das obrigas contraídas neste convenio por unha das partes facultará a outra para rescindilo, quedando automaticamente anulados todos os dereitos correspondentes sobre o obxecto do programa de colaboración conxunta, pero non así as obrigas contraídas no mesmo. En tal caso as partes realizarán a correspondente liquidación en relación cos gastos efectivamente executados polas entidades e debidamente xustificadas ou aqueles compromisos firmes adquiridos con terceiros que foran debidamente acreditados.



DÉCIMO PRIMEIRA. COMISIÓN MIXTA DE SEGUIMENTO

1. A Agadic nomeará un responsable do seguimento das actividades contempladas neste convenio.
2. Para o desenvolvemento das actividades obxecto do convenio créase, de acordo co previsto no artigo 49.f da Lei 40/2015, do 1 de outubro, de réxime xurídico do sector público, un órgano mixto de vixilancia e control da execución e aplicación deste convenio e de resolución de controversias administrativas. A esta comisión mixta de seguimento serán sometidas todas as cuestións derivadas do desenvolvemento deste convenio e non recollidas nel, e, con carácter previo, aquelas que impliquen desconformidade por algunha das partes asinantes.

A estes efectos, e no ámbito desta comisión mixta de seguimento, as partes manterán reunións periódicas de coordinación, seguimento e control das actividades levadas a cabo, nun proceso de colaboración mutua entre ambas.

3. Esta comisión estará composta polos seguintes membros:

- A persoa titular da presidencia da entidade ou persoa que legalmente a represente, ou unha persoa da entidade que a substitúa.
- A persoa titular da dirección da Agadic actuará como presidente e a suplencia exercerase pola persoa titular do Departamento de Coordinación Xeral e Xerencia da Agadic.
- Actuará como secretario, con voz pero sen voto, un funcionario da Agadic.

DÉCIMO SEGUNDA. NATUREZA XURÍDICA

1. Este convenio ten carácter administrativo e rexerese polas súas cláusulas e, no seu defecto, polo establecido na Lei 40/2015, do 1 de outubro, e demais normativa de aplicación.
2. Así mesmo, este convenio está excluído do ámbito de aplicación da Lei 9/2017, do 8 de novembro, de contratos do sector público, pola que se transpoñen ao ordenamento xurídico español as Directivas do Parlamento europeo e do Consello 2014/23/UE e 2014/24/UE, do 26 de febreiro de 2014, se ben observaranse os seus principios para resolver as lagoas e dúbidas que se puidesen presentar.

DÉCIMO TERCEIRA. VIXENCIA DO CONVENIO

Este convenio estará en vigor dende o día da súa sinatura ata o 30 de decembro de 2021.

E en proba de conformidade de canto antecede, asinan

POLA AGADIC

Jacobo Sutil Nesta
Director da Agadic
(P.D. do presidente do Consello Reitor
da Agadic, DOG 29/08/2012)

POR CAMIÑO ESCENA NORTE, AIE

José Antonio Vitoria Armendáriz
Administrador

